

**RI NIMATANEEL Q'ATAL TZIJ RE RI NIMATINAMIT PAXIL
CH'UTA Q'ATOL TZIJ RAJALIB'AL 22 - 2020
RI NIMATAQANEEL RE RI NIMATINAMIT PAXIL**

XA RUMA K'UWA'

La' uchaak upataan ri Nimakomoon tinamit jay taq konoje ri eb'ajuwach chwa ri nimatinamit kakijikib'a' ri utziil chomaal re ri kikooch loq'oxiik tikaweex ri jikil chupa ri Nimawuuj Q'atab'al Tziji re ri Nimatinamit Paxil ujikib'aam we ri kanimitaj ri nimak'axk'ool chwa ri komoon tinamit `utz karesaj jujun taq loq'oxik jikib'aam, we kuq'alisaaj nab'ee ri nimataqaneel re ri Nimatinamit junaam kuuk' ri Nimatqo'nelaab' re taq nimajaa, kakipaj upa sa' ri uch'uqeem jay ri k'axk'ool, kijunimaam ruuk' ri chuta q'atool tziji rajalib'al 7 re ri molob'al iib' ke e Nimataqaneel, Q'atab'al tziji re taqooj utziil chwa komoon.

XA RUMA K'UWA'

Ri ya'oj ub'eyaal ri uchola'j chaak re ri jaa re kunanik re Paxil xujikib'a' uxe'b'al ri anooj re rajawaxik re kayuq raqan ri q'ij ri nimak'axkool chwa komoon tinamit, ruma k'ula' chi rajawaxik kachap utza'm puwi' k'axk'ool taq q'ijool, ri xjikib'ax loq, ruuk' ri utaqeem ri Nimatinamit utz kukoj ri taqooj q'atoom tziji re kuchajij ri utziil wachaaj chike ri tikaweex.

XA RUMA K'UWA'

Ruuk' lo ri rajilab'al q'ij 24 re uroo' iik' che wa junaab', ri nimataqaneel re wa Nimatinamit Paxil kuuk' ri e ya'ib'al na'ooj xkikoj wa Ch'uta Q'atol tziji rajalib'al 9-2020, ri kuyuq raqan q'ij, junchik julajuj q'ij re kawinaq yey ri q'ij jikib'aam chupa ri nimak'axk'ool yab'iil che ri komoon tinamit k'o che ri ch'uta q'atool tziji rajalib'al 5-2020, chupa ri rajilab'al q'ij 5 re uroox iik' re wa junaab' 2020, chupa wa' xq'alijin wi xkoj ri jun jikib'nik chwi nimak'axk'ool che ri komoon tinamit ri lajuj che ri kawinaq q'ij chupa ronoje ri nimatinamit.

XA RUMA K'UWA'

Ri eb'animataqaneel chwi ri Nimatinamit uchaak uoataan kakijib'a' uwach ri Chuta q'atool tziji rajalib'al 9-2020 kojoom lo ruma ri nimataqaneel re ri Nimatinamit Paxil junimaam lo kuuk' ri e nimataqo'nelaab', xukoj ri jikib'anik q'atoj tziji ri jikil loq'oxik ya'oom.

RUMA K'URI':

Rumaa k'u ri nuchaak pataan ya'oom chupa ri ch'uta le'a'j 138, 139 jay 171 k'o chupa ri rajalib'al a) che ri Ajaaw Q'atab'al Tziji re ri Nimatinamit Paxil.

TAQOOJ:

Ch'utale'a'j 1. Kutzelej ujikib'axiik ri Ch'uta Qatool Tziji rajalib'al 9-2020, ri kuyuq q'ij che lajuj re kawinaq q'ij kajiki' tanchik chwa ri nimak'axk'ool re komoon tinamit k'o chupa ri ch'uta q'atool tziji rajilib'al 5-2020, re chupa ri q'ij 5 re ri uroox iik' re wa junaab' 2020 tzeleem ujikib'axiik jay ri kik'ojoom lo upa ri Ch'uta Q'atol Tziji rajilib'al 8-2020 ke ri ajuwach re Nimatinamit, e ri wa', ch'uta q'atool tziji ri rajilib'al 5-2020 kik'ojoom uwach ruuk' Ch'uta Q'atol Tziji rajilib'al 6-2020 che ri q'ij 21 re ri uroox iik' che wa junaab' 2020 Jay xkiyuq uwach ri Ch'uta Q'atool tziji rajilib'al 7-2020 chupa ri q'ij 24 che ri uroox iik' re wa junaab' 2020: ukab'ichaal tzeleem jay k'ojotal lo uwach chupa ri Ch'uta Q'atol Tziji Rajilib'al 6-2020 ruma ri Ch'uta Q'atool Tziji rajilib'al 9-2020 ke ri Eb'aj uwach re Nimatinamit xkoj chupa ri q'ij 24 re wa uroox iik' che wa junaab' 2020 jay k'ate k'uri' xnajtajir uwach ri Ch'uta Q'atool Tziji 5-2020 chupa ri Ch'uta Q'atool Tziji rajilib'al 8-2020 chupa ri q'ij 20 che ri ukaaj iik' che wa junaab' 2020 tzeleem uwach chupa ri Ch'uta Q'atol Tziji rajilib'al 21-2020 ke ri Ajuwach re Nimatinamit, che ri 30 chupa ri ukaaj iik' re ri junaab' 2020.

Ch'utale'a'j 2. Yakab'al uwach k'ij ri ajchaak re kunanik. Ri Jaa re Kunanik jay To'ob'eneel ke Komoon Tikaweex kutzukuj ub'eyaal ri uchakuxik ri junimaxiik pwaq chike ri tikaweex echokoom chupa ri chaak xa ajilan q'ij, xa jun tojonik re kito'b'al kakik'amo chwi ri tojonik kaya' chike, junaam che ri jun to'ob'al ri k'axk'ool COVID-19, jikib'aan chupa ri ka'ib' le'aj re ri q'atab'al tziji rajilab'al 20-2020, re ri enimataqaneel re Paxil, jinta juna junoq kuk'am ukalaaj chwi wa'.

Kajikib'ax u'aniik puq'ab' ri Ajuwach re ri Jaa re Kunanik, kub'uchok ajchaak e ajtijoxelaab' chwi kunanik kakik'utub'eej ri kiwuuj kik'isoom chi utza'm ri kitijonik jay katajin uyijib'axiik ri etaliil kiwuuj xa koye'eem chik jay jela' neri' ri epetinaq che jun chik nimatinamit jay kechakun chwi k'amal na'ooj chupa ri nima jaa re kunanik chupa ri nimatinamit Paxil, re keto'b'ik chwach wa k'axk'olaal yab'iil COVID-19.

Ri Jaa re Kunanik jay To'ob'eneel re Komoon Tinamit chi rajawaxik kutzukuj ub'eyaal ri uchakuxik re pacha re kichokoxiik jay kitojik ri eb'aj chaak.

Ch'utale'a'j 3. Kaya' chi retamaxik ri uchapab'exik ri pwaq chi kiwach ri eb'aj uwach Nimatinamit Paxil. Pa jeqeb'al lo re ujikib'axiik ukojik tzijj wa jun Ch'uta Q'atool Tzijj jay k'a pa kak'is wi ri k'axk'olaal yab'iil ruma ri Q'aaq' Teew Ojob' SARS-CoV-2 jay ri yab'iil re ri COVID-19, ri Mutza'j Ajuwach re Nimataqaneel re Kakichakuj pa iil aneem COVID-19 –COPRECOVID, kakiya chi reta'maxik ronoje q'iij Martes chi jujunaal wuqub' q'ij, pa tz'ib' jay pa kematziib' chi ri Mutza'j jikilik chwa Eb'aj uwach re Nimatinamit, jun tz'ib' tzijonik chaak, kaya'loxik pa kiq'ab' chikijujunaal ajuwach chupa ri Nimatinamit chwi taq wa', xoqo na ch'uti'n ta uwach che:

1. Tzijonik re ronoje, re ronoje q'iij jay re ri wuqub' q'ij, chwi ri yab'iil re COVID-19 pa ri tinamit Paxil, kojoom b'i retaliil taq wa': e janipa e k'olik, e janipa e k'olik ri q'axinaq pu q'axinaq ta chike jay ri na jinta chike, xa kuna' juun, xutzir b'i uwach, e janipa e kaminaq, e janipa k'o chike, komoon tinamit ixoq'ib'/ achijaab', uchola'j kijunaab', achi pu ixoq, uchola'j kijunaab' jay sa' ketzu'nik ri yewa'iib', xek'oji' chupa ri jaa re kunanik/xa eb'ik'oweel, taq utziil k'oleem, xoqo ne jela uya'ik chi reta'maxik, chupa siwan tinamit, tinamit jay chike komoon tikaweex. Xoqo junaam pa taq ri k'olib'al; k'olib'al kunanik re tinamit pu k'olib'a na reta tinamit, chajinik chike nimaq winaq; jay ri jaa k'olib'al re tinamit
2. Jamalik jay kichapab'eem taq ri ch'aat chupa ri uroox le'a'j chajinik chupa taq ri jaa re kunanik, kok b'i ri k'olib'al ri iil aneem riliik kunanik jay ri re xa ajilaam q'iij. Jamalik jay kichapab'eem ri k'olib'al re tikaweex kejoj'owik.
3. Uchapab'exik ronoje ri pwaq ya'talik chi utziil jay tzeleem uya'iik jikib'aam ruma ri Eb'aj uwach Nimatinamit re kakoj retaliil ri iil aneem riliik k'axk'oliil chwi kunanik uya'om ri COVID-19 ri Ajuwach re ri Jaa re Kunanik jay to'ob'al Komoon Tikaweex –MSPAS-, ri Ajuwach Chaak jay Tob'al Uwach Komoon Tinamit –MINTRAB-, ri Kachakun kuuk' ri Aj Chaak, -MAGA- To'ob'eneel re Yakab'al Komoon Tikaweex -MIDES- jay ri kechakun chwi pwaq, -MINECO-, ronoje wa' kaya' chi reta'maxik chi jujunal, uchola'j chaak, k'olib'al rajilab'al, juna k'olib'al anooj, uchola'j etaliil rajilab'al.
4. Wuuj jikib'am re chokonik re ilonik kachajinik k'axk'oliil uya'om kanoq ri yab'iil COVID-19 re ri MSPAS ruuk' tikaweex k'o kichaak pataan, kina'ooj chwi wa', jela' pacha' ri kitojik wa ajchaak. Chwi k'u wa' utz kaya' b'i ri b'i'aa'j puwi' ri MSPAS che ronoje ri mutza'j 0.
5. Tz'ib'aam ucholajil ri to'oob' sipaam, na reta tinamit, re Nimatinamit jay re jun chik tinamit naj, k'amoom, chakunisaam jay tz'ib'aam kan ucholajil chupa ri MSPAS, MIDES, MAGA jay MINTRAB.
6. Loq'ooj re ronoje q'iij, re pa wuqub' q'ij, jay moloom uchi' ri k'uul re q'atoj ch'uul xa julaj uchapab'exiik jay ri ch'uqub'al uwach ri k'uul jinta uq'ab'; ch'uqub'al jolomaaj xa re julaj; ch'uti'q, k'olik jay nima'q ch'uqub'al q'ab'aa'j, chuq'ub'al uwa eyaaj xa re julaa'j, ch'uqub'al uwa eyaaj N95 ruuk' uxlab'ib'al, ch'uqub'al uwa e'yaaj N95 jinta uxlab'ib'al che, ch'uqub'al uwa e'yaaj KN95, tob'al wachaaj, tob'al palaj, k'uul re tob'al iib', xajab' re kunanik q'atoj ch'akuul.
7. Loq'ooj ronoje q'iij, re pa wuqub' q'ij jay moloom uchi' xut'ub'al teew, yab'al uxlab', kuresaj lo ri ojob', ilib'al re uxlab'ib'al jay ch'aat ke yawa'ib' e nimitajinaq.
8. Tz'ib'aam ucholajil, ujachik ronoje q'iij, re wuqub' q'ij jay ri umoloom uchii' ri kunab'al, ri kachapab'exik ke ajkuun jay ri q'ataneel jay ri kichapab'al re kakito' kiib' ruuk', chupa ri oxib' le'aj re ilonik
9. Tz'ib'aam ucholajil ronoje ri loq'oj anitalik jay ri sipanik k'amoom chi taq chapab'al jay taq chapab'al re pajab'al re uq'ajisaxiik yab'iil jay we k'o chupa ri uch'akuul COVID-19.

10. Tz'ib'ital ronoje ri u'anoom ri pajan uq'ajilsaxiik ri yab'iil jay janipa chi tikaweex ka'an ronoje q'iij jay sa' ri uk'utub'eem.

Ronoje ri tz'ijonik nuk'uum chi saqiil re kunaneel jay ri kunaxik wa kaya' b'i pa uq'ab' ri Jaa re Paxil re chajineel re Komon Tikaweex.

Pa k'isib'al re wa 30 lo q'iij che ri k'axk'ool tzeleem ujib'axxik chupa wa Ch'uta Q'atool Tz'ij pa k'iq'ab' ri ajuwach re Nimataqaneel k'o wi re kakil ri iil annem riliik k'axk'oliil ri COVID-19 –PRECOVID- kamajataj usuuk' chikiwach ri eb'aj yijib'aneel re ri Nimatinamit re kaya' chi reta'mxik pa nuk'uum tz'ij re katzelex uwach ri tz'onob'enik kaki'an ri ajuwach tinamit.

Ch'utale'a'j 4. Aneem ub'eyaal chokoneem jay tojonik. Kaya' puq'ab' ri Nimajaa re Kunanik jay ri to'ob re Komoon Tikaweex –MSPAS- re ka'an ri chokonik re ajchaak k'o kina'ooj puwi' jay e kichak kipataan, iil uwach re kanuk' b'i ri chaak re kuq'atej kuk'uleb'ej uwach ri yab'iil COVID-19, xaqi tob' che ri motza'j e anoj chaak, k'a chupa ri 31 lo q'iij re ri ukab' lajuj iik' re 2020, xa katz'onoxik xew wa uchola'j:

- a) K'aak' uwuuj re uchola'j taq majab'al na'ooj'
- b) Etaliil uk'exwachiil uwuuj re kureqaleej ri una'ooj chwi wa chaak patan, u'anom chik pu xa tz'ibitalik.
- c) Uk'exwach ri u'etalil uchola'j winaq –DPI-.
- d) Etaliil uwuuj pa tz'ib'ital wi ub'i' chwi tojob'al, RTU.
- e) Etaliil uwuuj pa tz'ib'ital wi ub'i' ri majab'al una'ooj jay jikilik we xel lo ri uchaak patan.

Kapixab'ax ri Ajuwach re Pwaq re Komoon Tinamit re pacha' kutz'aqjisaj uwach ri ub'eyal Pwaq re kilitaj ri k'ulub'al uwach ri chaak anitalik re kuto' wa ch'uta le'a'j jay kuya ub'eyaal re wa tojonik che wa molob'al wuuj re tojonik, ruuk' ri Wuuj lik Rewi Tz'ib'am (CUR) re chi jujnal aj chaak k'o una'ooj puwi' pu ri ajchaak patan chokoom, che wa' na chi rajawaxik taj kakitz'ib'aaj kiib' chupa ri uwuuj ri Nimatinamit pu chupa ri uwuuj re Guatecompra..

We ri tikaweex kechakun ruuk' ri kichaak patan pu k'o kina'ooj puwi' we k'o ri ub'eyaal na unom ta chupa che ri uch'uqeem, kaya'i' kab'lajuj iik', re kuk'ule'aj uwach ri uch'uqeem, kajalax b'i che ri nab'e iik' re ri junaab' 2021; che k'u wa' na jinta q'atab'al che re kachokik kaya' uchaak, utz kuya ri uwujil pwaq re tojonik, ri Kilow re Wa' chi jujunal kukoj ri iil uwach re k'ulub'al che ri tz'ib'ital kan chupa wa q'ata'j tz'ij, chupa ri wo'ob' q'iij q'atoom echiri' kok wa Ch'uta q'atool tz'ij.

Kajib'ax uchakuxiik puq'ab' ri K'olib'al Uriliik Pwaq re Komoon Tikaweex re xuya' k'aak' ub'eyaal ri pwaq ya'oom che ri Jaa re Kunanik jay To'ob' re Komoon Tikaweex k'o chupa ri ch'uta le'a'j 14 jay 15 che ri Ch'uta Q'atol Tz'ij rajalib'al 12-2020 re ri Nimatinamit, q'atol tz'ij pa iil aneem riliik k'axk'oliil re kechajix ri tikaweex re Paxil ruma ri k'axkool uya'oom ri COVID-19 re ketoj ri ajchaak k'o kina'ooj puwi' jay ri e kichaak pataan iil uwach re kakil ri iil aneem riliik uwach.

Xa ruma ri ub'eyaal tojonik chike ri kechakun chi uloq chupa ri uroox iik' re wa junaab' 2020 ri Ajuwach re ri Pwaq jay ri Jaa re Kunanik jay To'ob' re komoon Tikaweex, ruuk' ri ub'eyaal jay junimam ruuk' ri iil uwach, kukuxtaj ri uya'ik ri pwaq re k'ulb'al uwach ri tojonik ruuk' pwaq chike ri ajchaak nim kina'ooj jay kechakun kuuk' wa tikaweex ri kakil ri iil aneem riliik k'axk'oliil ruma ri COVID-19 chupa taq ri jalajuj chakunib'al.

Chupa lo wa uwaqaq iik' k'a chupa ri ukab'lajuj iik' che wa junaab' 2020 re chaak, we chupa wa iik' b'i'im, ri kechakun chwi wa' pu ri Jaa re Kunanik jay ri To'ob' Komoon re Tikaweex karaaj ujalk'itixik ri uk'iyaal ri pwaq tz'onoom re kak'ulub'ex uwach ri tz'ib'aam chupa ri ch'uta le'a'j; wa' chi rajawaxik kata'ik iil uwach, ri uch'uqem re k'ulub'al uwach re kachakux wa chaak pataan pa uq'ab' k'o wi. Na utz taj kik'ow che kalaaj kajalk'atix uchapab'exik ri pwaq chupa ri jun iik'.

Ch'utale'a'j 5. Ri Nimataqaneel re Paxil chi rajawaxik, chupa wa unajtajil uwach che wa nimak'axkool re komoon tinamit juch'uum chupa wa Ch'uta Q'atol Tz'ij, ka'ani' ri jikib'aam pacha' na kaq'ax ta ri yab'iil Q'aaq' Teew Ojob' COVID-19; chi rajawaxik kesax upajiik ri yab'iil, chupa q'iij re chajin iib' jay ri ya'ooj uxo'lib'al ruuk' jun chik tikaweex, kachajix pa saqiil.

Jek'ula', kachakuxik jay kanimarisax uwach ri ub'eyaal chaak jay ri kojoom ujeqik ri chaak re pa taq tijonib'al, k'ayij, utuxik uwach chaak jay ronoje ri to'b'al iib' esaam.

Ch'utale'a'j 6. Ya'b'al ub'eyaal chi kok'ilaal. Ri kojoom re chajin iib' re to'b'al re utziil wachaaj re pacha' k'o ri tzelejeem chi kok'il chupa ri chaak, ri kechakun che ri jalajuj taq chaak kuuk' tikaweex, chi rajawaxik kakoj ri jikib'aam jay ka'an ronoje chupa ri ujeqik ri chaak re ch'ab'al pu juna chik ch'ab'al; jela pacha' keb'ok chupa konoje che ri q'iij re chaak re k'ayij jay chaak ruuk' pwaq.

Ch'utale'a'j 7. Ya'oj ub'eyaal b'ineem. Ruma ri iil anoj ch'ab'al chike ri tikaweex eb'aj Paxil jay re kakito' ri kik'asleem jay kakiki'koteb'ej, kaya'i' chike ri ajuwach kaki'an ch'ab'al jay utz keb'el b'i ri ebaj uwach re jalajuj taq motza'j, re kakilo jay kechakun ruuk' taq ri iil aneem riliik k'axk'oliil re kechakun kuuk' ri tikaweex pu re u'anik ri kichaak re to'oob' chupa ri kik'olib'al, k'o ki'etaliil wuuj re b'ineem.

Ch'utale'a'j 8. Ya'oj ub'eyaal ri b'ineem. Xa ruma taq ri chaak re unimaal ri iil aneem riliik k'axk'oliil chakuxoq, ya'oom b'ineem chike ri ajkuun re awaaj saqiil uk'utub'eem riib' re kato'b'ik chupa juna iil aneem riliik k'axk'oliil k'o chupa ri etaal na utz taj ka'an b'i eleem.

Ch'utale'a'j 9. Xjalk'itix upa ri uro' che ri q'ata'j tzii chupa ri ch'uta le'a'j 2 che ri Ch'uta Q'atool tzii rajalib'al 13-2020 re ri Eb'aj uwach ri Nimatinamit, Qatol Tzii re kuch'uqej ri pwaq chike ri Alk'o'aal ruma ri Xuya' kan ri yab'iil COVID-19, xtz'ib'ax kan jewa':

"keb'esax chupa wa ri tikaweex e k'o che juna jaa kakitoj 200 KWh che ri k'u'm q'aaq' xa re pa jun iik' jikib'aam chupa ri etaliil tojonik re ri jun iik' ek'owinaq chupa ri uka'm iik' re wa junaab' 2020 china ri kechakun ruuk' ri nimatinamit, china ri kijuch'um kiwuuj re kechakunik chupa wa q'ijool kuuk' ri komoon tikaweex utz kakik'am wa to'b'al chike ri tikaweex we ri kakik'am k'i pwaq (Q. 2,000.00) xa re jun iik', xoqo ruma juna chik sa'ch to'oob' kuk'amo, kojoom b'i ri k'o uchaak ruuk' ri nimatinamit pu kuk'am ri to'b'al che ri Jaa re Paxil Chajineel chike Komoon Tikaweex. Ma wa' katz'ib'ax chupa ri ku'm tz'iib'.

Ch'utale'a'j 10. K'o b'i puwi' ri k'isb'al re, che ri q'ataj tzii re ri le'a'j 2 che ri Ch'uta Q'atool tzii rajalib'al 13-2020 re ri Eb'aj uwach ri Nimatinamit, Q'atool Tzii re kuch'uqeej ri pwaq chike ri Alk'o'aal ruma ri Xuya' kan ri yab'iil COVID-19, xitz'ib'ax kan jewa':

"Ri okeem iil uwach chike ri nib'a'iib', utukel uchuu k'o'm pu utukel uqaaw k'o'm, nimaq winaq, tikaweex na tz'aaqat ta ko uch'akuul, tikaweex k'o ri nima yab'iil chike jay ri kalaxib'eem chi uloq ri yab'iil, ri alk'o'aal b'ayay ko kik'iyib'al wa ka'ani'ik chi jujunal alk'o'aal tob' ne ek'o junaam k'olib'al chi kijunal ketz'ib'axik ka'an okeem iil chike ma utz keb'ok chupa ri ub'eyaal chaak. Ketz'ib'ax chupa ri ku'm tzii chi rajawaxik keb'ok chupa ma e k'o chupa ri k'axk'ool, anoom okeem iil che, anoom ri pixab'anik che kilitaj pasaqiil we lik chi rajawaxik kak'amik, we na x'ani' ta wa cha'ooj re kaya'i' wa to'oob', katzaq pa tojob'al maak re wa'. Ri keb'ok chupa wa', ri jinta kiku'm q'aaq', ek'o chupa wa ch'uta Le'aj, wa' kakik'amo pwaq chik chupa ri ub'eyaal chaak".

Ch'utale'a'j 11. Kajalk'atix uwach ri Ch'uta Le'a'j 11 chupa Ch'uta Q'atool Tzii rajalib'al 13-2020 re ri Eb'aj uwach ri Nimatinamit, Q'atool Tzii re kuch'uqej ri pwaq chike ri Alk'o'aal ruma ri Xuya' kan ri yab'iil COVID-19, xkanaj kan jewa':

"**Ch'utale'a'j 11.** Loq'oxik re kuk'utub'ej riib' ri tikaweex. Re kakoj utzii wa q'atab'al tzii, ronoje uwujiil re k'utub'al iib' -DPI-, wa k'o lajuj junaab' che utz kachapab'exik, k'o uchaak re kuk'utub'ej ri uloq'oxik ri tikaweex chwach ri nimataqaneel re tinamit pu na re ta tinamit chupa ri junaab' 2020 chupa ri q'ijool re kak'is ri uchuq'ab' ri uwujil ri tikaweex."

Ch'utale'a'j 12. Wa' wajun Ch'uta Q'atool Tzii, xya' chi reta'maxik pa aneem iil uwach che ri nimatinamit ruuk' ri juch' xkiya' chi riij kalaj kik'iyaal chwa ri oxib' mutza'j ke ri eb'aj uwach tinamit e k'o chupa motza'j re Eb'aj Uwach Komoon Tinamit, xkijib'a xa pa jun molob'al iib' jay xok chupa ri uka'm q'iij echiri' xya' chi retamaxik chupa ri Diario Oficial.

KATAQI' B'I CHE RI NIMATAQNEEL RE KUJIKIB'A' UWACH, KUYAK UWACH JAY KAYA' CHI RETAMAXIK.

XJIKIB'AX UWACH CHUPA RI NIMAJAA KE RI TAQANELAAB' CHILA' PA RI TINAMIT PAXIL, CHUPA RI Q'IIJ 2 CHE RI UWAQAQ IIK' RE WA JUNAAB' JUN WINAQ RE WAQ Q'OQ'

